

BALLAPEI

Victoria per Schluein Glion

Ella runda principala dil Cup svizzer da ballapei dalla fin dall'jamna vargada ha Schluein Glion battiu a casa l'equipa da Neukirch-Egnach. Omisduas squadras dattan en 3. ligia. La squadra sur-silvana ha decidiu il giug ella secunda mesadad dil giug ed ei aschia ella proxima runda che vegn absolvada en rodund in meins. Negina fortuna ha Laax giu encunter St. Otmar. Laax che dat il campinadi dalla 5. ligia ha spiar cun 0:5 encunter l'equipa da 4. ligia. (fmr/hh)

1/32- final dil Cup svizzer per las equipas da 3. – 5. ligia

Panaduz – Schlarigna	3:1
Lai Valbella – Flums	5:6 s.p.
Vaz-sut – Speicher	3:0
Schluein Glion – Neukirch-Egnach	5:3
Rotmonten – Tusaun/Czas	10:1
Val Tamina – Landquart	1:7
Tavau – Glaruna	0:5
Laax – St. Otmar	0:5

BALLAPEI

Schluein Glion ei ina runda vinavon el Cup svizzer

Suenter in'emprema mesadad plitost ruasseivla ha Schluein Glion alzau la cadenza ella secunda mesadad e sittau quater gols ord bialas cumbinaziuns ed aschia decidiu il giug. Ils hosps da Neukirch-Egnach han denton mai resignau. Schluein Glion astga aschia dar ina secunda runda el Cup svizzer.

Ils hosps da Neukirch-Egnach ein stai all'entschatta dil giug pli allerts ed ein beinspert era i en avantatg. *Mirco Moser* ha deviau ina flanca da seniester da gol en. Ils giugadurs da Schluein Glion han pariu en l'entira emprema mesadad ualti passivs. Tuttina eis ei gartegiau ad els d'egalisar il giug aunc avon pausa. *Andri Michel* ha acceptau in regal dil goli ed alzau la balla elegant sur tal ora ella reit.

Il secund gol per Schluein Glion entras *Gion Kohler* ella 51avla minuta ed il tierz entras *Raffael Deplazes* ella 65avla minuta, ein mintgamai stai il resultat da bellezza cumbinaziuns cun precis pass finals ella profunditad. Mo duas minutas pli tard han ils hosps aunc inagada dau empau tensiun al giug cun sittar entras *Noah Altherr* suenter in siet da cantun il 3:2. Silsuenter han els aviert empau lur defensiu ed encuret d'egalisar. Quei ei stau bien per Schluein Glion. Ils attaccaders han survegniu empau dapli plaz ed els han era nezegiau quel. Enteifer mo ina minuta han *Raffael Deplazes* e *Remy Manetsch* sittau e decidiu definitivamein il giug.

Beat Dermont

Cup svizzer

Schluein Glion – Neukirch-Egnach 5:3 (1:1)

Crap Gries. 132 aspectatur(a)s. Arbitr: Dilamen.

Gols: 4. Moser 0:1; 40. Michel 1:1; 57. Kohler 2:1; 65. Deplazes 3:1; 67. Altherr 3:2; 78. Deplazes 4:2; 79. Manetsch 5:2; 83. Altherr 5:3 (penalti).

Schluein Glion: Mattia Büchler, Laurin Zala, Gianluca Casutt, Sgier, Holdegger (80. Studer), Kohler (69. Bundi), Paulin (77. Capeder), Michel, Vinzens (46. Manetsch), D'Atria, Deplazes.

Neukirch-Egnach: Wüst, Oswald, Schröder (85. Noureddine), Martino, Allenspach (69. Schoch), Schwitzer, Altherr, Stolz (68. Aerne), Held, Moser, Ziegler.

Remarcas: Cartas melnas: 26. Allenspach (hirundella), 56. Schwitzer (reclamar), 57. Martino (reclamar), 83. Casutt (foul) e 88. Studer (foul). Carta cotschna: 88. Held (malsportadad). Schluein Glion senza Afzali, Bearth, Aron Büchler, Caduff, Coray, Derungs e Lars Zala (blessai, reconvalescents ni absents). 22. siet ella petga Schluein Glion (D'Atria). Corners: 6:3.

LAAX

Success pils indigens ellas concurrenzas d'endurobike

La fin dall'jamna vargada ha giu liug a Laax la secunda cuorsa dalla «Swiss Enduro Series», la seria da cuorsas naziunals d'endurobike. Participontas e participonts da pliras nazions ein semesirai. La cuorsa ei stada signada da muments plein tensiun e prestaziuns impressiunontas, era dils indigens. Ella categoria dall'elita dallas dunnas ha *Anita Gebbrig* da Flem segirau il secund rang. Medemamein secund ei *Basil Weber* da Flem daventaus. Il campiuin svizzer ha buca saviu repeter la victoria digl onn vargau, mo ei tonaton selegraus d'argien ell'elita dils umens. Ella categoria aviarta ha negin pudiu spels indigens ora. Cun *Andrea Binkert* tier las damas ed *Armin Beeli* tier ils umens han dus concurrenz da Flem contonschiu mintgamai igl empren rang en lur categorias. Omisduas han saviu repeter las victorias digl onn vargau. (cdm/fmr)

TIR

Tschintg novs campions grischuns

Tar ils campinadis grischuns arma da 300 meters ha mo Silvia Plaz defendi ses titel. Elmar Fallet è sco gia pliras giadas daventà dubel campiuin grischun.



Pliras medaglias per ils tiradurs da Müstair. (da san.) Silvio Pitsch, Elmar Fallet e Fabian Schgör.



Sin il podest tar la concurrenza arma da militar en venter. (da san.) Andrea Stiffler, Ralf Komminoth e Christian Studer.

FOTOS GION NUTEGN STGIER

GION NUTEGN STGIER/FMR

Relaziuns optimalas, cun ina buna vista, ina glisch excellenta e per ina giada nagin vent al stand da tir «Rossboden» a Cuira sonda passada. Stada da la partida als campinadis grischuns arma da 300 meters e pistola 25/50 meters è bunamain l'entira elita chantunala da tir. Trag il differents programs han 120 tiradurs e tiraduras.

Emprim titel per Silvio Pitsch

Campiuin grischun cun l'arma da sport tar la concurrenza en venter è vegni *Michael Monsch* (Zezras). Il victur cun annada 1989 ha tratg cun 590 puncts in stupent resultat. Monsch ha da las sis passas tratg adina sur 97 puncts da 100 puncts pussaivels, duas giadas schizunt passas da 100 puncts. Sco gia il 2022 è *Fabian Schgör* (Müstair) daventà vicecampiuin grischun, quai lura cun nov puncts damain ch'il tiradur da Zezras e nov campiuin grischun. Cumpletà il podest ha *Meinrad Monsch* (Zezras), il bab dal victur. Il victur da

la categoria arma da sport duas posiziuns a numna *Silvio Pitsch* (Müstair). En absenza dal grond favorit *Georg Maurer* (Favugn) ha il Jauer gudagnà ses emprim titel da campiuin grischun. Pitsch ha fatg in resultat da 566 puncts. *Dumenic Lorenzetti* (Cuira) ha sajettà 559 puncts ed il terz *Norbert Caviezel* (Cuira) è vegni sin 558 puncts.

Strusch concurrenza per Silvia Plaz

Bunamain senza concurrenza è stada *Silvia Plaz* (Brugg/Savognin) en la concurrenza arma 57/03 en venter. Ella ha defendi ses titel cun far in resultat da 573 puncts. Plaz è da preschent la pli ferma tiradura grischuna e tutga er en Svizra tar l'elita da las tiraduras. Suenter il 2020 ed il 2022 è ella vegnida sonda passada a Cuira per la terza giada campiuin grischuna. *Hermann Sgier* (Tumegl) scu vicecampiuin grischun ha fatg sis puncts damain che Plaz. *Carl Frischknecht* (Tumegl), el ha cumpletà il podest. *Ralf Komminoth* (Maiavilla) è il nov campiuin grischun cun l'arma da militar en venter. El ha sajettà 569 puncts, trais puncts

dapli che *Andreas Stiffler* (Tavau) il vicecampiuin grischun. *Christian Studer* (Castrisch) cun 71 onns in dals vegls participants ha agiuntà il podest graztega a ses 562 puncts. En la concurrenza arma da militar duas posiziuns è *Otto Bass* (Rabius) il nov campiuin grischun cun far 536 puncts. *Max Davatz* (Valzeina) el è il nov campiuin grischun dals tiradurs giuvens.

Pac da far cunter Elmar Fallet

Sin la distanza da 50 meters è il meglier tiradur da pistola dal Grischun, *Elmar Fallet* (Müstair) daventà per ina giada dapli campiuin grischun. Il Jauer da 52 onns è vegni sin 566 puncts. *Stephan Lehmann* (Cuira) sco segund ha fatg nov puncts pli pauc che Fallet. *Bruno Battaglia* (Favugn) è daventà terz cun 552 puncts. Sin la distanza da 25 meters ha Fallet declassà anc per in pau dapli ses concurrenz. Il pur da la Val Müstair ha sajettà 582 puncts, gist 24 puncts dapli che *Ramon Cramer* (Zezras), il vicecampiuin grischun. Lehmann, el ha cumpletà il podest tar quella concurrenza cun far il medem resultat sco Cramer.

GOLF

Jeremy Freiburghaus ha inspirau ils golfists giuvens dil Grischun

Anastasia Sala dall'Engadina e Frederik Marius van der Wijk da Tavau ein daventai campions grischuns da golf dils juniors la mesjamna vargada a Sagogn. Il hosp dil di, il golfist professional Jeremy Freiburghaus, ha mussau als giuvens entginas fridas e rispundiu damondas.



Las participontas ed ils participonts dil campinadi da golf dallas junioras e dils juniors comunablaein cun Jeremy Freiburghaus che ha dau sez quei campinadi pli baul.

FOTO EDDY TER BRAAK/BUNA VISTA GOLF SAGOEN

Quater junioras e 33 juniors han battiu pil tetel da campiuin e campiuin da golf dils juniors a Sagogn. 11 dad els han battiu el strokeplay – handicap 18 e pli pauc – pil tetel da campiuin. Da bunas relaziuns han els gudi las cundiziuns pretensiusas dalla plazza da golf. La fin finala ei *Frederik Marius van der Wijk* da Tavau cun handicap 7, vegnius il meglier a frida cun quella cundiziuns e ha gudignau la concurrenza dils juniors cun ina carta da 77. *Tim Eduard Franzl*, medemamein da Tavau, ha terminau la concurrenza cun ina frida dapli ch'il victur. Tier las junioras ei suletamein l'Engiadinesa

Anastasia Sala stada partida pervia dil handicap ella categoria strokeplay. Ella ha terminau la concurrenza cun ina carta da 90.

Cussegls d'in professional

In punct culminont da quei campinadi ei la viseta da *Jeremy Freiburghaus* stada. Il giugadur ella vegliadetgna da 27 onns ei il mument il star dalla scena svizra da golf. 2019 eis el daventaus professional. Dapi questa stagiun separticepscha el alla DP World Tour e batta leu encunter ils megliers golfists dil mund. El ei selegraus d'esser a Sagogn: «Dar golf el Grischun ei adina in'aventura – ils cuolms e l'atmosfera ei

singulara.» Bandunar sia patria grischuna – siu domicil ei Panaduz – vegn per el buc en damonda. Silla piazza da golf a Sagogn ha el demonstau sia savida e rispundi damondas dallas junioras e dils juniors.

La fin d'jamna dils 26 e 27 d'uost 2023 vegn cuntinuau silla piazza Buna Vista Golf Sagogn cul campinadi grischun singul sco era il Grison Cup dils teams. Gliendisdis, ils 28 d'uost 2023 erueschan las senioras ed ils seniors allura lur campions. La fin da quei arranschament grond vegn fatga mardis, ils 19 da settember 2023 cul campinadi da staff e professional. (cdm/fmr)